

Govor predsjedatelja Doma naroda Parlamentarne skupštine BiH Mustafe Pamuka na Osmom zasjedanju Asocijacije europskih senata

Bern, 21. travanj 2006.

" Gospodine predsjedniče, dame i gospodo, dragi prijatelji,

Zadovoljstvo mi je što vas mogu pozdraviti u ime Doma naroda Parlamentarne skupštine Bosne i Hercegovine i čast mi je biti dio ovog uvaženog i značajnog skupa.

Dom naroda kao segment Parlamentarne skupštine Bosne i Hercegovine koji je praktično potpuno ravnopravan sa Predstavničkim domom ulaze značajne napore kako bi javnost bila što bolje informirana o njegovom radu. Periodično, a obično prilikom redovnih smjena na mjestu predsjedavajućeg ovog doma koje se dešavaju svakih osam mjeseci ali i češće, u javnost se emituju zbirni podaci o radu Doma naroda, vrsti i broju donesenih zakonodavnih i drugih odluka.

Interesantno je da, primjera radi, novinari u Bosni i Hercegovini raspolažu ne samo sa službenim nego i sa ličnim telefonskim brojevima delegata u Domu naroda i da ih obilato koriste kako bi došli do informacija nužnih za svoj rad. U cjelini, možemo reći da sa medijima imamo kvalitetnu saradnju a do sada se nije desilo da su uskraćeni za bilo koju informaciju, bez obzira na temu i njenu specifičnu težinu. Novinare koji redovno pišu o radu Parlamentarne skupštine i Doma naroda svaki delegat Doma lično poznaje i komunicira s njima bez ikakvih ograda. Takva praksa doprinijela je da su parlamentarni izvještači dobro obavješteni i kvalitet njihovog informiranja javnosti ovisi isključivo o njihovim vlastitim profesionalnim kvalitetima.

Malobrojnost Sekretarijata Parlamentarne skupštine BiH na žalost ne dozvoljava da se redovno produciraju i sistematski publikuju štampani specijalistički bilteni sa informacijama o radu Parlamentarne skupštine BiH pa i njenog Doma naroda. Posjedujemo ažurnu web prezentaciju Parlamenta a njen sastavni dio su saopćenja o važnim aktivnostima, informacije o predstojećim zbivanjima kao i pozivi građanima da učestvuju u kreiranju zakona kroz javne rasprave i davanje primjedbi i sugestija. Na taj način, ali često i

kroz druge forme obavještanja poput plaćenih oglasa ili direktna obraćanja putem medija i na press konferencijama, građani su obaviješteni o načinima na koje se mogu uključiti u proces kreiranja vlastite budućnosti kroz doprinos kvalitetnijem parlamentarnom djelovanju. Primjer za to je, recimo prije nekoliko dana održana javna rasprava o ustavnim promjenama u Bosni i Hercegovini. Njoj je u organizaciji i Doma naroda prisustvovalo blizu 500 građana iz svih struktura bosanskohercegovačkog društva dajući na taj način doprinos kvalitetnijoj raspravi o temeljnom konstitutivnom aktu bosanskohercegovačke države.

Prije otprilike 12 mjeseci, nakon što su se obnovom pojedinih prostora stekli uslovi, Parlamentarna skupština BiH pokrenula je projekat „Otvoreni parlament“ zahvaljujući kojem je kroz njene prostore prošlo približno dvije hiljade građana, mahom mladih ljudi, đaka i studenata. Projekat se u međuvremenu proširio i prerastao u tematsku jednosatnu emisiju koja se emituje nedjeljom u udarnom televizijskom terminu i bavi se najaktuelnijim temama iz parlamentarnog života. Sadržaj emisije predstavlja otvoreno sučeljavanje parlamentaraca i najšire javnosti povodom vrućih društvenih tema u Bosni i Hercegovini a ohrabrujući je svakako podatak da glednost ove emisije neprestano raste.

Na koncu, Dom naroda Parlamentarne skupštine BiH snažno promovira dosljednu primjenu Zakona o slobodi pristupa informacijama u BiH. Tim zakonskim aktom utvrđeno je da su dokumenti i informacije kojima raspolaže Parlamentarna skupština i druge institucije na svim razinama vlasti u BiH, te javna preduzeća predstavljaju javno dobro. U skladu s tim svaki pojedinac informacijama, na vlastiti zahtjev, može pristupiti a javni organ ih je po zakonu dužan obezbijediti. Nije se desilo da je na bilo koji zahtjev koji je prispjeo na adresu Doma naroda Parlamentarne skupštine izostane konkretan, blagovremen i potpun odgovor a Dom naroda će se svakako potruditi da tako bude i ubuduće.

Zahvaljujem na vašoj pažnji." (kraj)